

# Heilt til topps i skulemeisterskapen i bridge

Nore Neset 1 gjekk heilt til topps i skulemeisterskapen i bridge.

## OSLO

Den nasjonale skulemeisterskapen i bridge gjekk av stabelen på Løren i Oslo i helga. Os juniorbridgeklubb hadde med seg to lag frå Nore Neset barneskule og begge gjorde ein solid innsats i meisterskapen.

Men det var berre eitt av laga som fekk med seg hard valuta for innsatsen. Gjengen på Nore Neset 1, bestående av Mie Louise Askeland Døsen, Ole Morten Lyhammer Solberg, Annicka Lyssand Skaathun og Catharina Lundal, gjekk nemleg heilt til topps i klassen for barneskule-elevlar. Premien var på solide 5.000 kroner.

## Lange økter

I løpet av laurdag og søndag gjennomførte Nore Neset-laga 10 kampar à fem spel, inkludert eit internoppgjær. Her var det andrelaget som gjorde det best. Lennea Lundal, Julie Nordfonn, Edel Kofoed Rimstad og Emilie Hausvik vann denne runden 7-3.

Andrelaget oppnådde totalt sett best poengsum av Nore Neset-laga, men ettersom Edel går på ungdomsskulen, måtte dei konkurrere i ein klasse over.

Førstelaget hadde utelukkande deltakarar i barneskule-alder og vart til slutt altså best i denne klassen.

## Pengar til klubben

Sjølv om dette var ei skuleturnering var det Os juniorbridgeklubb som hadde med seg elevane. Difor er det også dei som får premiesjekken.

– Me får sjå kva me skal nytta pengane til. Det kan vera utstyr, og det kan vera tur og konkurranse. I sommar er det ei juniorbridgesamling på Austevoll og ei i Sandefjord. Kanskje gjengen får høve til å reisa på ei av desse, seier lagleiar Leif Juvik.

Lagleiarkollegga Torhild Rasmussen er strålende nøgd med dei unge norenesingane sin innsats.

– Dei spelar med stort pågangsmot og har trua på seg sjølv. Det kjem ein langt med, ler ho, og legg til:

– I fleire av kampane spelte dei mot ungdom som har spelt bridge mykje lengre enn dei, men enda likevel opp med å vinna. Det er sterkt, skryter Rasmussen.



**VINNARANE:** Gjengen på Nore Neset 1 fekk stor sjekk og måtte forevigast. Ikkje alle var like klar for posering. Frå venstre Catharina Lundal, Mie Louise Askeland Døsen, Ole Morten Lyhammer og Annicka Lyssand Skaathun. (Alle foto: Leif Juvik)

